



## INTRODUCZIUN

DAD ANDRI CASANOVA-BAUMGARTNER

*Tgi ei Jesus? Quella damonda crei Pieder da saver rispunder cun in sulet plaid: Cristus. E nus pudein ir d'accord. Jesus ei il Cristus, v.d. il Messias. Pieder para da saver tgi che Jesus ei. Mo el survegn paucas lingias pli tard in lavatgau, perquei ch'el para da ver capiu schuber lidinuot.*

*Jesus annunzia buca senza raschun sia passiu, mort e levada. Quei fa numnadamein part dalla risposta sin sia atgna damonda. Quella part ha Pieder denton aunc buca capiu. Jesus ei buca semplamein in che fa miracles. Anzi, el metta en moviment enzatgei cun sia veta e cun sia mort.*

*Tgi ei pia Jesus? – Quella damonda savein era nus buca rispunder cun in plaid. Nossa risposta duein nus dar cun nies agir e cun nossa veta.*

## EVANGELI

*Mc 8,27–35*

<sup>27</sup>Jesus ei serendus cun ses giuvnals els vitgs che audan tier Cesarea Filippi. Sin via ha el tschentau a ses giuvnals la damonda: Tgi di la glied che jeu seigi? <sup>28</sup>Els han rispundiu: Gion Battesta! Per auters eis ti Elia e per auters in dils profets. – <sup>29</sup>Mo per vus, ha el dumandau els, tgi sun jeu per vus? Cheu ha Pieder priu il plaid e detg: Ti eis il Cristus! <sup>30</sup>Lu ha el dau ad els il rigurus camond da plidar cun negin dad el.

<sup>31</sup>Ed el ha entschiet ad instruir els ch'il Fegl dil carstgaun hagi da pitir bia, ch'el vegni sbittaus dils vegls, dils premsacerdots e mussaders dalla lescha, ch'el vegni mazzaus, mo vegni a levar suenter treis dis da mort en veta. <sup>32</sup>Quei tut scheva el aviartamein. Sinquei ha Pieder priu el d'ina vart e fatg reproschas ad el. <sup>33</sup>Mo el ei seviults, ha mirau sin ses giuvnals e dau ina reprimanda a Pieder schend: Naven da mei, satan! Pertgei tes patratgs ein buca patratgs da Diu, mobein da carstgauns.

<sup>34</sup>Ed el ha clamau neutier il pievel ensemen cun ses giuvnals ed ha detg ad els: Sch'enzatgi vul esser miu giuvnal, sto el snegar sesez, prender sia crusch e suandar mei. <sup>35</sup>Pertgei tgi che less salvar sia veta, lez piarda ella. Mo tgi ch'ei prompts da piarder sia veta per amur da mei e digl evangeli, lez salva ella.